

四庫全書

集部

欽定四庫全書

文忠集卷一百十九

玉堂類藁十九

宋 周必大 撰

樂章鼓吹導引

致語附

乾道六年

加上太上皇后尊號冊寶樂章

一大慶殿發冊寶行禮

冊寶降殿

宮架作正安之樂

元祀介福 孰綏孰將 歸於尊親 孝哉君王

載鏤斯牒 載琢斯章 得名得壽 如虞紹唐

中書令侍中奉太上皇帝冊寶太上皇后冊寶詣殿

下當中南向

宮架作正安之樂

宗祈既成 交舉典冊 汝輔汝弼 威儀是力

陳於廣庭 迨此上日 巍巍煌煌 烏覩在昔

皇帝奉太上皇帝冊授太傅捧詣東階下奉寶并奉

太上皇后冊寶

宮架作禮定之樂

儀物陳矣

禮樂明矣

天子戾止

詔爾臣矣

陟降維則

恭且勤矣

芒芒四海

德教形矣

寶冊出門

宮架作正安之樂

天門九重

蕩蕩開誅

金支秀華

垂紳珮玦

或導或陪

率履不越

注民耳目

四表胥悅

一德壽宮加上尊號冊寶行禮

冊寶入殿門 宮架作正安之樂

禮神頌祇 福祿來下 不有榮名 孰緝伊嘏

千乘萬騎 魚魚雅雅 皇扉洞開 鞠躬如也

太上皇帝出宮升御座并禮畢降座

宮架作乾安之樂

穆穆聖顏 安安天步 有緝者儀 以莫不舉

天人和同 恩德洋普 億載萬年 為衆人父

太傅中書令侍中奉太上皇帝冊寶升殿

宮架作聖安之樂

大哉堯乎

南嚮垂裳

君哉舜也

拜而奉觴

縹藉光華

鼓鐘鏗鏘

三事稽首

宋德無疆

太傅中書令侍中奉太上皇后冊寶升殿

宮架作聖安之樂

乾元資始

坤元資生

允也聖德

同實異名

春王三朝

典冊並行

咨爾上公

相儀以登

一加上太上皇后尊號冊寶

皇帝從太上皇后冊寶詣宮中

宮架作正安之樂

維冊伊何 鏤玉垂鴻 維寶伊何 範金鈕龍

翊以誓御 間以笙鏞 誰敢不恭 天子實從

太上皇后出升御座并禮畢降座

宮架作坤安之樂

帝綽永福 功靡專有 既尊聖父 亦燕壽母

怡怡在宮 大典時受 彤管紀之 天長地久

內侍官舉太上皇后冊寶詣讀冊寶位

宮架作聖安之樂

歛福於郊

逢時之泰

揭明日月

侔德覆載

自我作古

域中有大

永言保之

眉壽無害

奉上冊寶導引曲

重華真主晨夕奉庭闈裡祀慶成時乾元坤載同歸美
寶冊兩光輝斑衣何似赭黃衣此事古今稀都人歡樂
嵩呼震聖壽搃天齊

皇太子受冊太慶殿宮架樂章

皇帝升御座

乾安之曲

建儲以賢

闕宮於東

典冊既脩

筮占既從

濟濟卿士

將將鼓鐘

天子戾止

盛哉禮容

皇太子入門受冊寶

明安之曲

琬琰嗟嗟

篆金煌煌

對揚於庭

是承是將

山重其暉

日重其光

觀瞻以懌

國有元良

皇太子出門受冊寶畢

明安之曲

淵中象德

玉裕凝姿

進退周旋

有肅其儀

既定國本

孟隆慶基

燕及兩宮

福祿如茨

皇帝降御座

乾安之曲

儲副豫定

器之公兮

冊授孔時

禮之隆兮

天步逶遲

旋九重兮

壽祉萬年

德無窮兮

淳熙二年

加上光堯壽聖憲天體道性仁誠德經武緯文
太上皇帝壽聖齊明廣慈太上皇后尊號冊

寶樂章

一大慶殿發冊寶行禮

冊寶降殿

宮架作正安之樂

高明者乾

博厚者坤

以清以寧

資始資生

壽胡可度

德胡可評

願言從欲

誕受強名

中書令侍中奉太上皇帝冊寶太上皇后冊寶詣殿

下當中南向

宮架作正安之樂

受命既長 福祿既康 如日之升 如月之常

追琢其章 金玉其相 君子萬年 保其家邦

皇帝奉太上皇帝冊寶授太傅捧詣東階下奉太上

皇后寶冊 宮架作禮安之樂

翠華之旗 靈鼉之鼓 陳於廣宇 相我盛舉

來汝公傳 肅乃儀矩 母愆於素 以篤多祜

冊寶出門

宮架作正安之樂

蚺蜺青龍

婉嬋象輿

其載伊何

煌煌金書

乃由端門

乃行康衢

於以榮親

振古所無

一德壽宮加上尊號冊寶行禮

冊寶入殿門

宮架作正安之樂

惟天為大

其德曰誠

惟堯則之

其性曰仁

乃文乃武

得壽得名

于萬斯年

以莫不增

太上皇帝出宮升御座并禮畢降座

宮架作乾安之樂

天行惟健

天步惟安

聖子中立

臣工四環

民無能名

威不遠顔

宋德宜頌

漢儀可刪

太傅中書令侍中奉太上皇帝冊寶升殿

宮架作聖安之樂

天畀遐福

允彰文德

維昔曠典

我龍舉之

徐爾陟降

敬爾威儀

申錫無彊

永言保之

太傅中書令侍中奉太上皇后冊寶升殿

宮架作聖安之樂

乾健坤從 陽剛陰相 迨茲受祉 允也並况

簾業在下 儀物在上 咨時三公 執事無曠

一加上太上皇后冊寶

皇帝從太上皇后冊寶詣宮中

宮架作正安之樂

不顯文王 之德之仁 亦有太似 式揚徽音

維冊維寶 乃玉乃金 伊誰從之 一人事親

太上皇后出升御座并禮畢降座

宮架作坤安之樂

重翟出房 褱衣被躬 委委佗佗 河潤山容

聖皇臨軒 聖母在宮 並受鴻名 與天無窮

內侍官舉太上皇后冊寶詣讀冊寶位

宮架作聖安之樂

珉玉玢幽 褱號精良 既刻厥文 亦鑄之章

象德維何 至靜而方 輔我先堯 萬壽無疆

奉上冊寶導引詞曲 高宮 導引

新陽初應樂事起彤庭和氣滿吳京帝家來慶東皇壽
西母共長生金書玉篆燦龍文前導沸懽聲脩齡無極
名無盡一歲一回增

淳熙三年

中宮冊寶文德殿發冊寶穆清殿受冊寶樂章

一文德殿發冊寶

皇帝升御座

乾安之樂

赫赫惟皇

如日之光

肅肅惟后

如月之常

禮行一時

明照無疆

天子泣止

疇敢不莊

使副入門

正安之樂

卜月惟良

練辰斯臧

臣工在廷

劒佩瑒瑒

來汝疑丞

明命是將

有淑其儀

無或怠遑

冊寶出門

正安之曲

刻簡以珉

鑄寶以金

持節伊誰

時維四鄰

自我文德

達之穆清

委蛇委蛇

往迄於成

皇帝降御座

乾安之曲

冊行何邇

於門東徧

禮備樂成

合扇鳴鞭

皇舉玉趾

如天之旋

燕及家邦

億萬斯年

一穆清殿受冊寶

皇后出閣

坤安之樂

椒塗蘭馭

河潤山容

副筭在首

褱衣被躬

靜女其姝

實翼實從

自彼西閣

聿來殿中

冊寶入門

宴安之樂

德隆位尊

禮厚文縟

乃篆斯金

乃縷斯玉

羣公盈門

執事有肅

願言保之

永鎮坤軸

皇后降殿

承安之樂

規殿沉沉

協氣攸收

明章婦順

表正人倫

躡是左墀

暨於中庭

尚宮顯相

罔有勿欽

皇后受冊寶

成安之曲

備物典冊

樂之鼓鐘

拜而受之

極其肅雝

司言司寶

各以職從

行地有慶

與天無窮

皇后升座

和安之曲

容典既膺

壺彝既正

羽衛外列

揚顏中映

如帝如天

以莊以靚

六官承式

二南流詠

班首引內命婦入門

惠安之曲

葛覃節用

樛木逮下

形為嬪則

夙已心化

茲臨長秋

遂正諸夏

以慶以祈

百祥來迓

班首引外命婦入門

咸安之曲

碩人其頤

公侯之妻

翟茀以朝

象服是宜

如星之芒 邈月之輝 母儀既瞻 羣心則夷

皇后降座

徽安之曲

窈窕淑女 備六服兮 陟降多儀 聳羣目兮

內治允修 陰教肅兮 宜君宜王 綏百福兮

皇后歸閣

泰安之曲

天監有周 是生太任 亦有太妣 嗣其徽音

孰如兩宮 慈愛相承 思齊之任 復見于今

淳熙六年

明堂大禮前二日朝獻景靈宮樂章

皇帝盥洗

宮架奏黃鐘宮乾安之曲

合宮之享

報本奉先

欽惟道祖

濬發濬源

駕言謁欵

其盥惟虔

尚監精衷

錫祚綿綿

皇帝詣聖祖位

登歌作大呂宮乾安之曲

駿命有開

慶基無穹

祇率百辟

仰瞻睟容

鼓鐘斯和 黍稷斯豐 靈其居歆 福祿來崇

皇帝還位

登歌作大吕宫乾安之曲

嘉玉既設 量幣既陳 髣髴靈旂 來顧來寧

對越伊何 厥惟一純 佑我熙事 以迄於成

尚書奏饌

宫架奏黃鐘宫吉安之曲

發祥仙源 流澤萬世 曷其報之 親饗三歲

相維列卿 潔粢是饋 匪物之尚 誠之為貴

皇帝再盥洗

宮架奏黃鐘宮乾安之曲

華燈熒煌 瑞烟氤氲 威神如在 蠲潔必親

再盥于壘 再悅于巾 皇心肅祇 其敢憚勤

皇帝再詣聖祖位

登歌作大呂宮乾安之曲

歲逢有年 月旅無射 我將我享 如幾如式

肅爾臣工 諧爾金石 本原休功 垂裕罔極
皇帝還位

登歌作大吕宫乾安之曲

旨酒思柔 神具醉止 工祝既告 孝孫旋位
何以酢之 純嘏來備 燕及雲來 蕃衍無已
文舞退武舞進

宫架奏黄鐘宫正安之樂

象德之成 有奕其舞 一弛一張 進旅退旅

嘒以管簫 和以鏞鼓 神其樂康 永錫多祜

前一日朝享太廟別廟樂章

皇帝詣別廟

宮架作無射宮乾安之曲

涓選休辰 於秋之杪 既齋既戒 爰假祖廟

有恤儀坤 舊章是徵 髦士奚為 天子純孝

皇帝升別廟殿

登歌作仲呂宮乾安之曲

宗祀九筵 先薦闕宮 陟自東階 煌煌袞龍
於穆聖善 監茲禮容 是饗是宜 介福無窮
皇帝詣徽宗室酌獻

宮架奏無射宮承元之曲

明明徽祖 撫世昇平 制禮作樂 發政施仁
聖靈在天 德澤在民 億萬斯年 保佑後人
皇帝詣懿節皇后室酌獻

登歌作仲呂宮散安之曲

不顯文母 厚德維坤 仙馭雖邈 徽音固存

瑟彼玉璫 酌此鬱尊 簡簡穰穰 裕我後昆

皇帝降殿

登歌作夾鐘宮乾安之曲

三歲親祠 於禮莫盛 入太室裸 徧於列聖

陟降有儀 而主乎敬 祀事孔明 邦家賴慶

皇帝還大次

宮架奏無射宮乾安之曲

禮既行矣 樂既陳矣 維祖維妣 安且寧矣
皇舉玉趾 佩鐸鳴矣 拜況總章 於厥明矣

明堂大禮鼓吹 無射宮導引舊黃鐘宮

合宮親饗青女肅長空精意與天通后皇臨顧誰為侑
文祖暨神功函蒙福祉歲常豐聲教被華戎兩宮眉壽
同榮樂戩穀永來崇

合宮歌

聖明朝曠典乘秋舉大饗本仁祖九室八牖四戶敕躬齋戒

格堪輿盛牲實俎並侑總稽古玉露乍肅天宇冰輪下照
金鋪燎烟噓呵鬱尊香雲間舞髣髴翔坐靈心咸嘉娛衆
星俞美光屬照煩珠清曉御丹鳳湛恩徧浹率溥歡聲雷
動嶽鎮呼徐命法駕萬騎花盈路獻昨慈極壽同箕翼事
超唐虞看平燕雲從此興文偃武待重會諸侯依舊東都
奏劄

先據太常寺申依已降指揮脩潤製撰將來明堂大禮
前二日朝獻景靈宮前一日朝獻太廟至日明堂行禮

樂章并鼓吹導引臣某等今逐一
看詳除別無抵牾去處即合從舊
外將合脩潤者脩潤訖所有別當製撰者已重別製撰並於逐項聲說如得允當乞賜批降付本院施行其明堂酌獻昊天上帝皇地祇太祖皇帝太宗皇帝樂章四首已曾奏請乞依典故御製候頒降日却除去今來所具四章伏取進止

淳熙六年七月二十七日奉御筆批依

又奏

仰惟陛下參稽古誼將以季秋大饗於明堂合祫並侑悉

用郊祀之制此盛禮也惟是紹興樂章多因翰林學士汪藻所撰略加增損今年四月內禮官已奏請到聖旨下學士院修潤製撰臣等竊見皇祐二年宰臣文彥博等言明堂大饗天地祖宗位酌獻樂章乞從御製於是仁宗親作四曲用之至嘉祐七年又製明堂送神迎神樂章政和七年徽宗御製明堂樂曲九章紹興二十八年太上亦製南郊并前二日朝獻景靈宮前一日朝饗太廟共十三章惟中興以來屢享明堂而樂章未經御製稀世濶典意若有待欲望聖慈依

累朝故事特紆宸藻親製天帝地祇太祖太宗四位酌獻

樂章

外有奠幣四曲或乞御製或且仍舊已於逐項貼黃進呈

不惟允協前規光於簡

冊亦於陛下欽奉天地祖宗之意實為宜稱臣等今錄仁宗及太上御製繳進并以汪藻舊付附見左方伏取進止

生辰正旦紫宸殿宴致語

乾道六年

金國賀會慶節使副到闕紫宸殿宴致語口號勾

合曲詞

致語

臣聞雙舸馳輿紀武帝躬郊之月五星聚井兆高皇受命之年集天瑞於上冬應誕辰於今日肆陳華宴以樂嘉賓共惟皇帝陛下子視兆民日新庶政事政養志躬曾閔之難能迪哲永年邁商周之前烈金鑑慶流虹之旦寶鄰通使牡之良共祝堯齡是均鎬飲五百里綏五百里甸舉欣遠至而邇安八千歲春八千歲秋更喜天長而地久臣等叨居樂部常酌懽謠敢以耳聞形於口號

口號

瑞氣輕籠合殿香上尊初破早寒霜千秋節應千齡運
萬歲聲隨萬歲觴境似華胥民氣樂夢如帝所樂聲長
年年太史前期奏南極星明聖厯昌

勾合曲

時當繞電宴錫需雲君子有酒旨且多已傳觴於漢朝
治世之音安以樂盡奏技於虞廷上奉天顏教坊合曲
乾道七年

金國賀正旦使副到闕紫宸殿宴致語口號勾

合曲詞

正月四日

致語

風解凍以迎春既會同於漢殿露晞陽而錫燕方樂豈
於周京肅瑞節以在廷集華簪而就列共惟皇帝陛下
聰明冠古仁孝通天上鴻名於德壽之宮已講頌椒之
禮陳黛耜於思文之殿將催望杏之耕人皞皞於熙臺
日遲遲於化國下九龍於瑤輦雲卷天臨上萬歲之玉

危嵩呼鼇杆臣等猥緣薄技謬藉伶坊不度蕪才敢呈
口號

口號

北斗回杓恰指寅東皇御極蚤施仁光風麗日依稀轉
御柳宮花次第新魚藻有頌安萬物鹿革式燕樂嘉賓
小臣請祝君王壽乾道宜過一萬春

勾合曲

綵燕宜春方陳高會儀鳳下管更洽多歡上奉天顏教

坊合曲

乾道八年

金國賀正旦使副到闕紫宸殿宴致語口號勾

合曲詞

正月五日

致語

青陽動陸頌寬大之新書丹陛傳觴啟惠慈之廣宴是
稽元會之禮載樂嘉賓之心共惟皇帝陛下妙握乾符勃
興泰治履端於始無愆伏之陰陽與物為春有發生之

草木候條風之應律晞湛露以宣恩駢羅犧象之尊曼
衍魚龍之戲雪殘鳩鵲耀初日於金鋪香裊狻猊雜瑞
烟於綵仗天回一笑朝洽多歡臣等猥以賤工獲瞻高
會雖難形於聖德當仰達於輿情不度蕪才敢呈口號

口號

絳闕嵯峨映五雲華簪合還會芳辰盡收殘臘嚴凝氣
散作新年浩蕩春琰竽頻宣恩意重金絲徐韻樂聲純
欲知朝野懽娛處聽取三呼萬歲人

勾合曲

泛椒栢於衢尊已效萬年之祝備笙簫於舜樂當諧九奏之音上悅天顏教坊合曲

淳熙三年

金國賀會慶聖節使副到闕紫宸殿宴致語口

號勾合曲詞

致語

先是有旨止用十句

臣聞渚遊五老昔開飛電之祥廷設九賓今應需雲之

象恭惟皇帝陛下仁充天性德懋日新嘉祝聖之華封
啟示慈之周宴酒殽維楚鐘鼓斯和臣等輒採懽謠恭
陳口號

口號

十月為陽慶小春電樞來應帝王真天長地久千秋節
鰲抃懽呼四海人黼座袞龍明日月繡整珠履切星辰
河圖已告無疆壽安得區區計古椿

勾合曲

會啟雲龍恩均魚藻慶一人之曼壽洽百辟之多懼上
悅天顏教坊合曲

淳熙四年

金國賀會慶節使副到闕紫宸殿宴致語口號

勾合曲詞

致語

臣聞赤光照室應夢日之昌期華使賓廷講需雲之高
會恭惟皇帝陛下道參輿蓋明坐羲舒南山之壽方增

永臨宸極北斗之漿可挹深注衢尊臣等敬酌人情恭
陳口號

口號

九陞天高輦下珣千官雲集履鳴潮霜迎愛日融城濕
香帶祥風合殿飄周宴恩濃魚在藻舜廷化洽鳳儀蕭
清臺夜夜占南極常有華星炳絳霄

勾合曲

黼宸端臨簪纓環拱觀君臣之宴樂知金石之諧和上

悅天顏教坊合曲

淳熙五年

金國賀正旦使副到闕紫宸殿宴致語口號句

合曲詞

正月四日

致語

臣聞蒼龍携斗兆春色於皇州丹鳳儀韶聆治音於宸宴共惟皇帝陛下仁均蠢動德被萌芽玉燭初調已占豐歲之夢金壘載酌用樂嘉賓之心臣等輒罄蕪才敢


呈口號

口號

淳熙紀號過千齡玉歷今開第五春
北極天高乾象正
東郊風暖物華新
漏添化國融和日
律饗熙臺鼓舞人
願挹滄溟供壽酒
無窮無盡奉嚴宸

勾合曲

星弁盈庭春旗簇伏和氣潜通於和樂
綵雲低映於綵
山上悅天顏教坊合曲



文忠集卷一百十九

欽定四庫全書

集部

文忠集卷一百

二十二

詳校官庶吉士

臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣李元位

欽定四庫全書

文忠集卷一百二十

玉堂類藁二十

宋 周必大 撰

召試館職策題

乾道六年

試選人王希呂

九月二十七日

問古人通患有三人材不足邦用不贍甲兵不衆也及
觀春秋戰國之際齊晉秦楚迭為長雄姑置而弗論至

如魯衛曹鄭之屬地廣者纔數百里小或百里無歲不
侵伐無歲不會盟資糧靡屢犧牲玉帛亦有限矣頃未
聞以錢穀甲兵為病而具有官君子大者固已傑然出
乎其類小者猶足以名一藝而占一善當是時學校之
政井地蒐狩之法固以大壞所以致此者必有道矣兩
漢之興其佐命功臣非刀筆屠販則盜賊敗降之餘也
其民疲於轉饟殘於鋒鏑能服田力穡者有幾其兵皆
履百戰肉厭於原野血流於川谷能披堅執銳者有幾

然亦不聞以是三者為病又何術也三國鼎峙五嶽之
氣益分壤地益徧而其人材愈衆邦用亦充甲兵亦加
多非如後世孜孜於科舉屑屑於理財皇皇於募兵也
子大夫留心史學馳騁千古試攷彼之所以優游應變
者何道後之所以力勞效寡者何尤尚論古人而有補
於今日是所望於洽聞也母迂母略庶備聖擇

淳熙三年

試太常博士許蒼舒

二月二十三日

問三代以還中原未定而夷狄亦弱及其定也彼亦盛焉借漢而論略可見矣冒頓單于不陸梁於劉項交戰之時而崛強於垓下混一之後元成之間漢業微矣頽乃保塞來朝曾無風塵之警光武中興更通舊好而單于驕倨凶暴視柔懷而弗顧至于諸部爭亂南北分庭然後或破或臣始伸國威此漢氏周旋北狄之大要也豈所謂內寧必有外患者耶抑待之以寬則狼子野心不可馴耶乘其弱者易為力折其暴者難為功耶不然設

施駕馭自有得失也昔戰國亦多故矣而區區燕趙不
難於制胡此與劉項之際何異若乃秦并天下而胡屏
迹長城之外是又與兩漢之初不同矣意者華自華夷
自夷其興衰治否初不相關歟抑天時人事未易以常
理推歟因漢事并攷周唐之舊而極陳之將以復於上

淳熙四年

試赴召胡晉臣

三月十日

問恭惟皇上留意館閣將以儲卿大夫之才歲中召試

不過一二邊之至也予大夫來自蜀道當此異選有司
承詔發策其敢泛為虛文而求無實之論乎願專以蜀
事為質夫蜀之利害衆矣而其大者有三財用也甲兵
也馬政也在熙豐時提益利梓夔四路稅苗茶鹽之入
與夫場務正課之輸計以貫石足兩之屬通不過八百
三十餘萬而其費則止於七百四十餘萬是一歲可得
百萬之贏矣中興以來上供經摠制之額乃為錢六百
九萬四千視異時全入之數已不相遠則夫常賦雜征

當不翅乎三倍而其支費抑又夥矣凡供軍之錢留於
蜀下於武昌蓋二十萬而芻糧布帛不與焉其他郡邑
經常之費水旱盜賊之脩猶未論也然則民力其可不
裕乎祖宗時蜀距遼夏甚遠所脩者西南小夷耳而四
路保甲及土丁子弟義軍弩手嘗至七十五萬人平居
無事散處其鄉疆場有故藉以捍禦今固不然由金房
而上被邊之州咸宿重兵不可一日撤也五十年間西
北舊人日以少新軍來日以衆氣槩拳勇相視何如然

則兵籍其可不念乎異時陝西歲市馬萬有八千而熙
秦通遠十居七八所謂階珉纔四千耳蜀惟黎文叙等
州許以互市其數亦不過乎階岷此其大畧也今熙秦
版圖未入職方而階岷西馬增至六千黎文諸郡俱溢
舊額費之無藝固不當靳其如良駑相半効牽萬里行
者踣於道至者羸於廐數雖加多用則不足然則馬政
其可不圖乎三者大計也方聖主孜孜於西顧往歲既
償百萬預借之緡近者方補四十七萬折估之數寬恤

之恩如此其於蜀事特患無所聞不患不能行也盍具言之當亟復於上

淳熙四年

試軍器監丞葉山

十一月十九日

問古之君子道德積於中則英華發於外因事而有言譬如風行於水雲行於空自然成文豈假彫篆篆組之功也哉歷觀綴文之士衆矣頃不必問姑以聖賢為質孔子稱堯曰煥乎其有文章考之載籍煥乎者安在子

貢曰夫子之文章可得而聞也求之經傳敢問可聞者
何辭四科之設文學預焉然子游子夏曾不能贊一辭
於春秋則所謂以文學稱者果何見歟鄭之四賢相須
乃濟然居則應對賓客不容緩也出而有事四方不偕
行也則所謂討論潤色者果何待歟婦人猶能賦詩何
後世老師宿儒反不通其義乎漢朝人莫不能文何大
臣少文不學猶見譏於史乎由漢以來學士大夫所共推
尊以為著書而不失古君子之道意者揚雄王通而已

然艱深淺易之譏摹訪魯論之誚有不能免蓋異乎自然成文者矣彼知其力不足而強為之歟抑為文者固當用意而準古也韓愈晚出於唐獨以六經之文為諸儒倡其去取決不苟矣然推尊楊雄以為過於老子老子豈易過哉至王通乃無一語評其是非又何意也主上發言為經肆筆成書固已追跡帝堯之文思比隆夫子之將聖然萬幾之暇猶有取乎藝文深惟本朝述作之盛遠過前代而所謂文海者精粗混併不足傳遠乃

詔館閣之士刊定而繕寫之使學者有所矜式德意厚矣予大夫膺被特召將接武於書林古今文章諒所熟復盡極辨數者之疑以待上問

淳熙五年

試太學正鄭鏐

五月十日

問夏商以前幣為三品自太公立九府圜法後世往往以錢為幣而其用之輕重則繫乎時本朝鹽鐵領於三司其後專置使以摠九路故鑄銅之數視歷代為多自

元豐二年增使者為二其一領湖廣江西其一領閩浙
淮南江東迨至元祐復合于一又慮諸道莫與之協力
也紹聖二年始命提點刑獄兼治坑冶明年又詔轉運
使預聞其事崇寧間則雖提舉常平亦預焉此祖宗時
設官之大略也中興以來用度既廣泉府之入浸虧於舊
議者謂數前之費可得一錢而官屬吏卒其費不可計
始也分命兩使於贛於饒蓋倣元豐之制也未幾費一
而存一又未幾舉廢之而歸其職於戶部蓋倣三司之

制也當時議者不以為便則又委之諸道轉運使蓋酌
紹聖之制也既而任責不專課之益賒尋既復其一繼
復增為二今蓋定為一司矣此近歲設官之大略也敢
問專任之與並置利害為孰重既置使者而參以諸司
得失為何如或曰任人有能否不在乎官之衆寡也居
官有勤惰不在乎職之參互也然則由今之法何以使
之無弊用今之吏何以使之有成富貴之家積錙不洩
何以使之流布百工道釋冒法銷毀何以使之畏避舶

商榷易舟車四出何以使之禁止必有確論其著於篇
將以復於上

試宏詞人趙彥中

六月二日

問朋黨之名不著於帝王之時而見於漢唐之季其故
何也二帝三王緝熙光明之學足以照知羣下之賢否
故其臣亦皆精白一心以承休德有善則相師有過則
相規尚何黨之有逮夫漢唐之君學術不足以辨邪正
君子小人雜進於朝自相傾軋遂使甘陵分部牛李爭

權其害卒至於橫流而莫之止非萬世之龜鑑歟恭惟
皇上聖學高妙邁迹乎帝王比因議政深闢文宗難易
之說以為朋黨之起由主聽之不明而其原始於時君
不知學又曰惟賢是進惟不肖是退則黨論自消大哉
聖謨真與六經相為表裏士大夫獲際盛時安心營職
可謂幸矣抑嘗攷本朝名儒惟歐陽修蘇軾尤長於議
論修著朋黨論軾從而續之師友淵源疑無異辭然修
之言曰小人無朋同利則暫相黨引見利則反相賊害

惟君子修身則同道相益事國則同心共濟其後為五代史六臣贊又反覆言之是蓋以君子為有朋而謂小人無朋也軾之言也君子如嘉禾封植甚難去之甚易小人如惡草不種而生去之最難斥其一則援之者衆盡其類則致怨也深是蓋以君子無黨而謂小人有黨也不識二者之論其果異乎抑殊塗而同歸乎不然因事立言各有攸當乎願具陳之將以復於上

淳熙六年

試太學正劉先祖 十月九日

問自鄉舉里選之法廢取士未有不以言者也三代而下其可論者漢唐耳漢重經術故雖有孝弟有力田有茂材有孝廉有四科有賢良而明經為多唐重詞章故雖設制科至八十有六又有宏詞有明經諸科而進士得人為盛此其大略也本朝取人之制實倣焉治平而上專用詩賦近於唐矣彫篆之工疑若不適於用然元臣大老通經博古之士布滿中外累聖賴之以致太平

其故何也熙寧元豐以後經術造士殆過於漢矣是宜
得聖人之傳備賢人之業校短量長乃或未然此又何
也豈人材盛多有相之道初不繫於科舉耶抑詩賦經
義均無益於政事未易優劣耶主上慨然將大有為於
天下而患無真才實能可以仰副任使不於科舉取之
將孰取之三代遠矣其制殆未易復今欲一之以詞章
則慮學者舍本而圖末固不可也一之以經術則人專
一藝百餘年間命題已徧平時既可預備一旦全用他

人之作未易辨也無已則兼是二者或庶幾焉然而元祐紹興皆嘗力行行未久輒罷蓋志分而習不專藝業所以難工能者寡不能者衆主司所以難考易搖亟改不在茲乎若乃詞科應用之文視詩賦論策無大相遠而用力尤省剽襲尤多不過稍取其記問耳此固非通行之法也然則由今之制草前之弊而欲得人如漢唐如祖宗為國家立功名著事業於他日其必有道矣至於郡國解試之日真偽雜進動以萬計而考官不過數

人又皆漕臣按籍而差者計一道之官數且不足能否
何擇毋恠乎遺才之多也欲揀其弊頌豈無術盍極陳
之將以獻於上

淳熙七年

試提轄文思院熊克

三月十二日

問唐虞稽古建官惟百今考之二典堯所命者義和四
子而已舜所咨者二十有二人而已奉天道授人時凡
揆岳內外之事舉集焉則所謂允釐百工庶積咸熙與

夫百僚師師百工惟時者如之何設官分職而屢省乃成也且平水土降播種明五刑典禮樂類皆久任而弗易彼考幽明而黜陟之其等差亦有可見者乎三代官制莫詳於周禮姑以王畿言之自公卿大夫至於府史胥徒不啻五萬餘人大略世守其官而卿大夫方且三年大比興其賢能抑將何以處此彼太宰計羣吏而誅賞之其條目亦有可者乎自是而後言治者惟予漢唐置吏有常員用人無定法固有旬月封侯取宰相起

家而為諫大夫者矣中常之才何以進之薦舉乎考課
乎抑惟年勞而序遷乎其與近世選調而升京秩者異
乎同也皇上勵精圖乂知人則哲真賢實能用之惟恐
弗及固不待累歲月計資級也惟是有司保任遷改之
制行之已久不能無弊吏負冗矣而來者滋多甲令備
矣而奉行弗虔舉者不必才才者未必舉是以薦進之
章常交於公車而循良之政罕聞乎郡縣解紃更張不
在此時乎乃因議臣之言稍為限制既盡善矣然徒法

不能以自行也伊欲中外之臣無謬舉無虛辭犇競之風殄孤遠之路伸於以副聖主汲汲人材之本意豈無策乎若乃唐虞之黜陟成周之誅賞漢唐之序進載于經備于史亦豈無可為今日獻者乎盍詳著於篇將以復於上

文忠集卷一百二十

欽定四庫全書

文忠集卷一百二十一

政府應制藁

宋 周必大 撰

淳熙八年

勸農桑手詔

任參政日被旨撰

朕身處法宮心乎衣食之原廼者得天之時蠶麥既登
及命近甸取而視之則或歧秀而穠短繭成而絲薄非
種植風戾之功有所未至歟夫七月陳王業之詩也其

辭乃專在乎農桑亦惟人事是訓是勉然後可以收全功凡爾監司守令其謹諭朕意孜孜於勸課使五畝之宅植之以桑百畝之田勿奪其時則吾黎民不饑不寒而王政成矣朕將稽奉行之勤怠詔賞罰焉

廷試策問

三月十三日得旨
留身面諭撰進

蓋聞舜受堯禪七政齊於上十二州肇於下唐太宗親傳高祖之業兵寢刑措開四夷為郡縣大功盛烈咸在初載何其速也朕以寡昧祇承內禪宵衣旰食二十年

於茲懼無以揚祖宗之功副太上之託思與賢雋講論
治道予大夫羣至在廷懷才待問朕甚嘉之顧聞昌言
以輔不逮夫民者邦之本也朕時使薄斂冀臻乎富庶
然小遇旱乾則傾倉廩發封椿猶或不足豈承流宣化
者失其職歟抑無常產者多逐末歟賢者邦之基也朕
數路取人宜不勝其用矣然濟濟多士猶愧以寧之世
豈作成有未至歟抑招聘有未備歟文王卑服則在位
化之今朕節儉先衆何以俗猶侈靡宣帝總覈則吏稱

其職今朕勵精率下何以俗猶惰偷小大之臣罔不延見咨詢考察亦云至矣或曰貌言有時而失然則知人之法孰要卿士牧守更出迭入旋觀詳試亦云備矣或曰人材各有所宜然則器使之道何先勲十二轉古之賞也近歲有功者進官加職而已賦祿所以滋多任子所以日衆勲品具在今可復乎司寇園土古之刑也近世殺越人於貨徒流而已復出為盜將何以懲園土之制今可議乎雖然此特政事耳天之所輔者德也所助

者順也民之所懷者仁也所助者信也其脩在此其應
在彼使朕躬行不急以獲乎天人之佑虞唐功烈庶幾
乎馴致亦曷敢有遲速計哉子大夫其茂明之朕將親
覽

奏殿試策問題空劄子

臣近擬進御試進士策題緣草本內有合題空之類失
於奏稟并欲更改一字今具下項

祇承內禪 內禪字合題起 天之所輔者德也

天字合題起 天人之佑 天字合題起 覆出為
惡惡字未足以盡之今欲改作覆出為盜

右欲望聖慈至期一併降付御藥院照應施行取進止

奏改正策問內怠字劄子

三月二十三日

臣適見御藥院繳御試策問赴中書省內躬行不急誤
雕作躬行不迫恐舉人答策有害文義欲望聖慈特令
改正取進止

淳熙十四年

御筆 三月五日

將來殿試策題更數日卿擬進來

回奏 任右丞相日

臣恭準御筆令擬進殿試策題臣謹當遵稟十一二間
繳進取裁伏乞睿照

廷試策問

朕臨政願治有年於茲矣自強不息法天之健久而不
已如日之常期仰對於慈訓以復我烈祖之德而志勤

道遠未獲厥心是用博延豪英訊以先務予大夫賁然
來思必有闕蘊樂為朕言肆垂聽而問焉夫移風易俗
本乎選士漢尚經術唐重詞章人才雖多勲業蓋寡今
朕躬教立道訓迪多士伊欲知類通達化民成俗協於
大學之道厥路奚繇家給人足莫如力田自齊作內政
而兵農分秦開阡陌而井田廢今淮漢多曠土江浙多
閒民伊欲三時務農一時講武稍復成周之舊其術安
在六條察州自古固然朕下臧否之令至丁寧也而刺

舉之章雖交公車循良之政罕聞郡國黜幽陟明果可行乎舉爾所知聖有明訓朕設薦舉之制甚周悉也而歲負溢於銓曹寒俊沉於選調以公減私得無說乎何以使吏稱其職毋崇空言何以使民安其業毋事末作何以使刑清而姦改何以使邇安而遠至其質之古而不悖酌之今而可行悉意以陳朕將親覽

奏劄

三月十五日

臣恭稟聖訓擬到殿試策問別紙錄進深恐未副聖意

伏聽處分

太上皇帝服藥擬赦書

十月

朕仰惟太上皇帝惠心有孚聖壽無極比稍違於和豫
今已向於痊安宜推博愛之仁誕布如春之澤庶因祐
助永底康寧可大赦天下赦書到日罪人除犯刼殺謀
殺故殺鬪殺並為已殺人者并十惡偽造符印放火及
盜官物入已罪至死官員犯入已贓將校軍人公人犯
枉法監主自盜贓不赦內枉法自盜罪至死情理輕者

奏取指揮聞殺罪至死情理輕者減一等刺配千里外
牢成斷訖錄案聞奏其餘罪無輕重已發覺未發覺已
結正未結正咸赦除之應天下寺觀赦書到之次日啟
建祝聖壽道場五日仍禁屠宰務要嚴潔應五嶽四瀆
名山大川及祠廟載於祠典者所在精虔致禱於戲紹
業中興方享萬年之報因親大賚是均四海之權咨爾

臣民體予德意

奉御筆批可
並依此施行

奏劄

臣等適來面奉聖訓太上皇帝服藥恐合祈禱除已討論外臣等退而商議謂須頒降赦宥今輒一面議定又慮漏洩不敢令人繕寫只以藁本繳進其當用與否及遲速先後恭俟聖裁

右中書敕草三紙御批六字在焉并以奏藁附於後初太上服王涇涼劑下利不止是月四日上宣諭云太上飲食全減恐合祈禱可理會既退密問它醫知疾勢頗殆因語二府故事當肆赦恐倉卒不能舉行

欲擬以進衆猶遲疑乃獨秉筆持草而與左相以下連名封入時已過午至申時上批可並依此施行比覆奏下禮部雕印頒降已三鼓矣詰朝奏事上曰昨日一面理會赦書甚當後四日而德壽晏駕云淳熙十四年十月十八日臣某謹記

淳熙十五年

高宗謚冊文

任右相日撰

維淳熙十五年歲次戊申三月丁酉朔某日孝子嗣皇

帝臣

御名

謹再拜稽首言曰臣聞書契之作雖始伏羲

百篇之文實首堯帝蓋其勲足以放上世其德足以被
四表功成弗處褰裳去之蕩蕩巍巍與天同大稱謂之
際無得而言故其生也以堯為名其沒也以堯為號當
世然之後世傳之亦惟賓其實而已自是厥後載祀滋
久先於前聞獨我聖考恭惟大行太上皇帝有聰明之
質而輔之以稽古有文思之美而將之以允恭茂實英
聲挺出朱邸靖康之際皇輿播遷首提義旅入衛王室

旋承父兄即真之詔勉副軍民推戴之誠受命商丘適
符藝祖側身脩行撥亂反正強敵外熾六師剪之羣盜
內訌四征獮之遂使宗社再安華戎一視此則堯之有
成功也紹興而後內治日修東甌請貢却而弗受北狄
講好為親許之祐陵弓劍歸自萬里慈寧駟馭就養九
重事有至難以誠而濟然後立九廟以致孝享躬三推
以勸農耕睦九族戢干戈省刑罰薄稅斂措斯民於仁
壽致萬邦之協和此則堯之光宅天下也制作禮樂開

設學校三歲見帝者十有二而神示罔不格大比取士者十有一而賢雋無或遺日聽治朝則羣公卿士服神明之斷每臨講殿則老師宿儒駭折衷之言萬幾餘暇尤精八法六經諸子細書幾徧翰墨有志該括古今專門名家自謂弗及此又堯之煥乎文章也臨御三紀未嘗倦勤黃屋非心乃遜於位別宮燕處耽玩至道四受徽號之冊八歸大禮之昨歲時誕節威儀交舉二十六

年殆如一日臣民有創見之嘆單于有歆羨之辭漢之

櫟陽唐之大安歲月何淺制度何陋蓋自堯迄今三千
五百有餘載始終一揆未聞若斯之至者也夫惟中興
之烈如彼內禪之盛如此是宜儒生文士陳篇奏頌前
後以千萬計下至匹夫匹婦若髻若髻亦知歌詠盛德
於康衢之中書之史冊垂之億世蓋有不可勝紀者矣
臣以菲質夙奉慈訓覆燾以君父之德付畀以神器之
重方將養志於有截承顏乎無窮遽聆殂落之誥難勝
喪考之痛三年制服固已恪行七月告期敢違舊典博

稽僉論請命郊丘人謀天同仰對景爍謹遣具官臣某
奉玉冊玉寶上尊謚曰聖神武文憲孝皇帝廟號高宗
伏惟新陟之靈在帝左右垂顧廟祔序於祖宗於萬斯
年永祚家國嗚呼哀哉

初欲作堯宗臨時議者謂金有宗堯遂謚高宗上曰
乃聖乃神乃武乃文此四者書專指堯德今謚曰聖
神武文正與堯同謚文不必動也

淳熙十六年

禪位詔

正月二十日擬進

朕以菲質循堯之道兢業萬幾歷歲彌長荷兩儀九廟之德邊鄙不聳年穀順成底於小康爰自宅憂以來勉親聽斷不得日奉先帝之几筵躬行聖母之定省固已懔然於懷況乎春秋寢高思釋重負皇太子某仁孝聰哲久司匕鬯軍國之務歷試參決宜付大寶撫綏萬邦俾予一人獲遂事親之心永膺天下之養不其美歟皇太子可即皇帝位朕當移御重華宮故茲詔示想宜知

悉

皇帝初即位擬進上壽皇尊號詔

二月二日

仰惟君父專意奉親決策內禪天地大恩無以報稱形容盛德典禮具存而聖意謙抑諭使弗請雖慈訓不敢固違然臣子歸尊誼豈容已謹上皇帝尊號曰至尊壽皇聖帝皇后尊號曰壽成皇后擇日奉表陳請

擬求言指揮

前宰執

臨御云初方求讜論惟時舊弼敢後咨詢佇聞嘉謀以
輔不逮可令學士院降詔

在外侍從

纂承伊始下詔求言侍從舊人理宜咨訪其殫所蘊附
遞以聞

文忠集卷一百二十一

欽定四庫全書

文忠集卷一百二十二

歷官表奏一

宋 周必大 撰

紹興三十二年

辭免察官奏狀

左宣教郎秘書省正字兼國史院編脩官臣周某狀奏
右臣今月四日準尚書省劄子三省同奉聖旨除臣監
察御史日下供職者自天有命踏地無容伏念臣奮自

寒鄉最為冗士獻芻言於召試之日蒙睿獎於面對之初久並英游莫伸薄效不圖簡記更誤選掄分直栖鳳之南察事行馬之外臣猶自駭人謂斯何敢陳量已之言祈寢出綸之渥俾安舊次免累聖知伏候勅旨

五月五日

三省同奉
聖旨不允

辭免起居郎奏狀

左奉議郎兼察御史臣周某狀奏右臣今月二十二日準尚書省劄子三省同奉聖旨除臣起居郎日下供職

者明命初傳震恐無地臣竊以柱下置史君舉必書自我祖宗甚難此選或以久次文館或以嘗厯劇曹或以德望詞華度越流輩然後稽參與議舉而授之未有資淺望輕徑躋而躡至者如臣無狀豈不自知欲勉於問學而智識甚凡欲勤於事為而才力不逮三年朝路一善未聞太上皇帝意其退縮似恬靜鄙樸似愚直拔而寘之六察之列使事陛下今既數月矣畧無補報日夜常自刻責豈謂驟膺簡擢入侍螭階稽之舊章既慚

踐歷槩之近比更愧超踰幸今誤恩雖加而贊辭未出
擇人改授猶可及也惟陛下矜其誠懇而俯從之臣不
勝幸願謹錄奏聞伏候勅旨

八月二十四日三省同奉聖旨不允

申三省乞罷兼職第一劄子

右奉議郎試起居郎兼編類聖政所詳定官兼權中書
舍人周某劄子昨準尚書省劄子奉聖旨兼權中書舍
人今來正官員數已多合罷權候指揮

十一月二十五日三省同奉聖

旨令周某依舊兼
權陳俊卿職事

第二劄子

某先奉聖旨兼權中書舍人今緣正官員數已多遂乞
罷權今月二十五日準尚書省劄子奉聖旨令依舊兼
權陳俊卿職事者某竊惟官闕利權員多則罷此亦常
事何待固辭况外制已有兩人而奉使於外者又將還
闕豈可以某暫曾攝事姑令依舊充員居之不安其敢
自恕欲望再與敷奏俯從所請庶幾小官不失辭受之

義候指揮

十一月二十六日三省同
奉聖旨依已降指揮不允

奏乞罷兼職狀

臣近者兩具劄子乞罷兼權中書舍人職事準尚書省劄子三省同奉聖旨依已降指揮不允伏念臣昨被旨兼攝之初豈不知與聞基命潤色書贊非臣不達國體素無文采之人所能勝任然以謂劉珙出使不過數月西掖獨員或有妨礙故雖自知非據亦復承命不辭今劉珙將歸唐文若張震在職若猶迫於威命儼然如舊則是暫權乃欲久假兩請皆為文其於臣辭受之義無

乃戾乎又況遇闕則他職兼領官多則指日罷去蓋百
司庶府之常事臣不敢遠有援引昨見侍讀闕官嘗命
侍講黃中時暫兼權尋除洪遵中即乞罷若計侍讀員
數則中尚可兼領此最近事人皆知之今臣所以力辭
本非廉退但事體當爾不敢中輟區區之心寔在於此
伏望聖慈特賜矜察許臣解罷上件兼權職事非惟私
心得以少安抑亦免為識者之所譏誚不勝幸甚疊冒
天威罪當萬死取進止

十二月十一日三
省同奉聖旨不允

隆興元年

乞宮觀奏狀

左奉議郎試起居郎兼編類聖政所詳定官兼權中書
舍人臣周某狀奏臣輒瀝血誠仰干聖造伏念臣先塋
多在吉州惟臣母塋信州久欲遷奉緣臣脩數於朝力
所未能爰自今年正月屢經朝廷陳乞假告繼又力請
外祠而宰執不為敷奏因循至今人子之心晨夕不遑
緣此心氣怔忡居常抱病安能纂修記注攝賛書命必

由曠職重抵司敗之誅若非觸冒萬死投誠君父則進退失據誰肯為臣宮者伏望聖慈下臣此章宣問宰執如臣前此果因遷葬乞去非敢矯妄即授臣宮觀一次使遂其區區之志臣今齒髮尚壯它時或有繁劇任使雖赴湯蹈火所不敢辭輕犯天威臣無任震灼俟命之至謹錄奏聞伏候勅旨

三月二十八日三省同奉聖旨依所乞差主管台州崇道觀任

使居

乾道六年

乞未赴南劍申省劄子

三月二十七日

左朝奉郎新權發遣南劍州周某劄子昨準勅差權發遣南劍州替王岡待闕已及二年依近制合赴行在奏事緣某舊有心氣之疾近來發歇不常觸事憤忘見往它處尋訪醫藥若不自度勉強前去不惟到闕之日定失朝儀亦慮臨民之際決致瘵曠欲望朝廷特與敷奏改授祠廟差遣或許改贖已差下人劉敏求庶幾他日所患痊平尚能効犬馬之力伏候指揮

右勘會已降指揮除福建路提刑填見闕今劄付新
除福建路提點刑獄公事周朝奉疾速前來奏事訖
前去之任準此

乞避私諱申省劄子

五月十五日

左朝奉郎周某準尚書省劄子三月二十五日三省同
奉聖旨除某福建路提點刑獄公事填見闕伏念某去
國八年復叨委使感戴上恩豈應辭避但某父名利建
與本路名號相犯既非所連之字即與偏諱不同兼某

近以心氣舊疾時復發作方辭典郡敢冒察刑欲望朝廷檢會前劄及今來乞避私諱事理特與敷奏畀以祠祿或改授一待闕差遣庶幾愚分得以少安緣再準省劄令疾速前來奏事訖前去之任不敢稽違朝命見迤邐至前路聽候指揮

吏部供到檢準紹興令諸府號官稱犯父祖嫌名及二名偏犯者皆

不避勘會本官父名利建即係二名偏犯依條不合迴避申聞事

右劄付新除福建路提點刑獄公事周朝奉遵已依劄下事理疾速奏事訖前去之任準此

辭免秘書少監兼權直學士院奏狀

左朝奉郎新權發遣福建路提點刑獄公事臣周某狀
奏右臣今月十八日準尚書省劄子三省同奉聖旨除
臣秘書少監兼權直學士院者冒膺兼組增震孤衷竊
以貳職仙蓬攝官禁苑俱為清選專用名儒伏念臣早
誤聖知中歸農畝八歲傾心於天日一朝稽首於軒墀
辱臨遣之溫言將遙驅於暑路忽叨改命大過初心惟
舊學之素迂加比年之病忘雖厚恩未報詎敢忘魏闕

之存然薄技無堪恐難寓禁林之直固有令行而或反
仰祈人欲之曲從所有上件恩命臣未敢祇受謹錄奏

聞伏候勅旨

七月二十三日三省同奉聖旨不允

草晁公武詔書不當待罪奏狀

右臣近蒙聖恩擢貳秘書寓直翰苑臣自度荒疎愚顛
加之素有心氣之疾難以攝視草之任嘗具辭免乞賜
寢罷既而祇受不允之命微賤小臣未敢再有陳請只
俟旦夕輪對冀得披露血誠今者果緣書詔輕重失倫

至勤御筆改定不職之罪合寘嚴誅萬一陛下海涵天
覆未忍遽加鈇鉞即乞改授在外官觀差遣使得休養
心神循省愆咎干犯天威臣無任戰慄俟命之至謹錄

奏聞伏候勅旨

八月九日三省
同奉聖旨不允

求外劄子

左朝散郎試秘書少監兼權直學士院臣周某劄子奏
臣竊見近制卿監郎官率用寔厯監司郡守之人盖欲
更民事脩任使也臣雖曾蒙恩差知南劍州除福建路

提刑然方赴而改未考治民之功前日陛下賜清閒之燕嘗具奏江西賦重民困間有寇盜當擇守令布宣德化臣誠不佞欲望聖慈稽用更迭詔書畀之小郡使試行其言自效尺寸於以少副陛下視內外器使人材之意臣不勝幸願取進止

九月十五日三省同奉聖旨不允

乞免學士院兼職劄子

左朝散郎試秘書少監兼國史院編修官寔錄院檢討官兼權直學士院周某劄子近蒙勅差兼史院寔錄院

職事緣四朝國史及徽宗寔錄事體重大非悉心竭力
考証同異尋繹事實無由可以下筆欲望朝廷特與敷
奏免攝內制職事庶幾一意本職不至闕誤伏候指揮

十月二十四日三
省同奉聖旨不允

乾道七年

乞宮觀奏狀

具位臣周某狀奏右臣才質駑下一無可取方其少時
弊精神於舉業因得心氣之疾間遇發作觸事差謬比

蒙聖恩寘在冊府屢嘗自弛未奉俞旨蒞職復踰半年
猶冀圖報萬一而所苦浸劇寢食不寧外雖粗若可支
中寔難於勉強若不亟去殆將隕生欲望聖慈特賜矜
憫改授在外官觀差遣使得一意將理免至遂為廢人
干冒天威臣無任戰汗之至謹錄奏聞伏候勅旨

三月七日

三省同奉
聖旨不允

乞改作時暫兼權兵部侍郎劄子

具位周某劄子今月一日準尚書省劄子節文三省同

奉聖旨周某兼權兵部侍郎緣上件職事元係太府少卿查籥兼權目今雖在建康府其兼職自合依舊欲望朝廷特與敷奏止令某暫時兼權候查籥回日罷庶幾事體為允伏候指揮

五月四日三省同奉聖旨依

辭免權禮部侍郎奏狀

左朝散郎試秘書少監兼國史院編脩官寔錄院檢討官兼權直學士院兼權兵部侍郎周某狀奏右臣今月十九日準尚書省劄子節文三省同奉聖旨周某可除

權禮部侍郎日下供職者有命自天措身無地伏念臣
空疎愚懦一無可取決科干祿本以代耕而陛下居
潛邸已記其不腆之文暨登大寶首在拔擢之數恩私
未報自投閒散比叨起廢愈被眷知蓬閣史闡禁林武
部身兼數職莫匪清華雖陛下激勵疲駑每諭進擢之
意而愚臣自揣才分屢控退休之辭今者成命驟頒聯
榮禁路載惟蹇淺加以病衰玉帛鐘鼓猶未辨其名物
而況秩宗典樂以和邦國乃使臣輩與聞其事豈不上

累聖鑒下為清議所譏伏望陛下嚴近侍之選收已行之令俾臣姑安舊次亦足勉効其愚所有恩命未敢祇受謹錄奏聞伏候勅旨

七月二十三日三省同奉聖旨不允

辭免陞同修國史實錄院同修撰奏狀

左朝散郎權尚書禮部侍郎兼權直學士院臣周某某狀
奏右臣準尚書省劄子七月二十四日三省同奉聖旨
差臣同修國史寔錄院同修撰通不出三員之數者殊
渥荐加危衷增厲伏念臣本疎文藝尤乏史才攝事玉

堂已慙於舊直計員金鑰更假於新榮名稽叙進之規
寔溢同升之數昔劉子元居秘書而領史事自矜又處
於載言賀知章遷儀曹而兼集賢士論共榮其兩命臣
學非二子而寵萃一時雖出誤知難安愚分倘不量牛
馬之走乃或冒熊魚之魚必嘖煩言上辜洪造願俯從
於固避庶無負於曲成所有恩命臣未敢祇受謹錄奏

聞伏候勅旨

七月二十六日三省同奉聖旨不允

申省再辭狀

某近具奏辭免兼同修國史寔錄院同修撰恩命準尚
書省劄子脩奉聖旨不允者竊以編摩之職既嘗冒居
位序之升非敢多遜寔以通計員數近無此例倘隳典
故懼速罪辜欲望朝廷再與敷奏許免上件兼職伏候
指揮

七月二十八日省劄
檢會已降指揮不允

謝禮部侍郎表

臣某言伏奉告命除臣權禮部侍郎仍改賜章服者掌
秘府之圖書久玷英游之列奉甘泉之筆橐駝汙法從

之班恩厚踰涯感深次骨臣某申謝臣聞知人繇乎堯
哲分職著於周官明三德以有家所以撫五辰而凝庶
績佐六卿而率屬所以倡九牧而阜兆民何畏巧言其
惟吉士如臣者以一介甚踈之迹荷兩朝特達之知槐
市蓬山早塵華選烏臺鸞掖浸陟要塗嘗中返於江湖
亦旋歸於魏闕踰年於此片善莫聞心踧踖以不安顏
忸怩而罔措所期顯黜乃誤殊遷惟宗伯古之清曹惟
貳卿今之撫仕禮樂自天子出雖上稟於聖謨遷豆則

有司存當俯求於故寔夫何鄙樸而許攝承夙夜直哉
惟清莫遂夔龍之遜文章煥焉可述更慙車馬之飛茲
蓋伏遇皇帝陛下冠古聰明御圖勤儉辨臣隣之邪正
昭示抑揚閔風俗之隳偷力加勸沮知臣雖無可用之
寔察臣粗有不欺之愚特假寵榮俾陪亞旋臣敢不益
堅素守更厲丹心效守職之小忠詎塞論思之責竭事
君之大節或酬覆幬之仁臣無任

舉自代奏狀

朝散郎權尚書禮部侍郎兼同修國史兼寔錄院同修
撰臣周某準令侍從官授訖三日舉官一員自代者右
臣伏睹左奉議郎直敷文閣寧國府司馬鄭伯熊學廣
多聞履方行粹俾聯華於禁近必振譽於寅清臣寔不
如舉以自代

辭免兼侍講奏狀

具位臣周某狀奏右臣準尚書省劄子三省同奉聖旨
差臣兼侍講者成命初傳以懼以恐臣聞藝祖甫定天

下即召處士王昭素講易禁中兼訪民情真宗復置講
讀學士分直秘閣專脩顧問歷聖相承遂以崇儒重道
為家法自陛下握圖御極首闢鰲禁命經筵官番宿其
中朝宣夕召殆無虛日博問勒詢罔匪治道盖不特藉
其敷釋大義誦說舊聞應邇英故事而已臣以陋儒懵
於經術叨陪禁從常懼不稱而況日朝拱垂可以告辰
猷寓直北門可以脩夜對使有萬分之補不待更參講
勸也伏望曲回淵鑒亟寢兼官或特起逸民追開寶之

盛或改畀時彥廣咸平之規使臣上不至妨賢下不失
量力是陛下賜臣多矣孰與貪榮踰分之愧乎所有恩
命臣未敢祇受謹錄奏聞伏候勅旨

九月九日三省
同奉聖旨不允

謝侍講表

臣某言伏奉告命差臣兼侍講者王人多聞尚急詢謀
之益儒者寡要况非殫洽之才望虎觀之深嚴負鵜梁
之愧慙臣某中謝臣竊以祖宗盛際講讀最親匪爵秩
之攸拘惟英賢之是任上或處三公之舊下亦延九品

之卑雖言語侍從之勞日計不足然緝熙光明之助職
思其憂孰謂下臣可膺高選此蓋伏遇皇帝陛下有堯
之聰明而靡忘稽古有禹之勤儉而力戒矜能六藝之
文蓋皆見於行事諸儒之學豈足望於清光更資一得
之愚使效萬分之補載考朝廷之制凡兼文館之官雖
宰司提領之尊無內史訓詞之寵惟陪經幄必錫贊書
蓋道既重則禮烏可輕而待之隆則報宜加厚臣雖極
陋敢不深思區區傳註之間難規近效懇懇忠嘉之際

或厲遠圖臣無任

乾道八年

辭免書吳璘碑奏狀

右臣伏準尚書省劄子脩奉聖旨差臣書吳璘神道碑者臣竊以書雖一藝亦惟素習乃工臣之不能衆所共悉倘或強其所短勒之豐碑深恐上無以稱陛下追寵舊勲之心下無以慰吳挺顯揚其親之意願回前命別付能者謹錄奏聞伏候勅旨

正月七日奉
聖旨不允

乞免兼中書舍人劄子

臣昨奉聖旨以趙雄同知貢舉差臣攝行西掖文書臣以時暫不敢辭避近者趙雄丁憂復令臣依舊兼權緣臣兼職已多才不能給決致瘵曠上累聖知今林幾送伴來歸韓元吉已嘗攝事欲望聖慈免臣兼權取進止

二月三日
奉聖旨依

謝宮觀表

臣某言昨奉聖旨與在外宮觀又奉聖旨今日下出門

尋準勅差提舉江州太平興國宮任便居住者囊封初
奏簿責隨加猶昇祠官示寬黜典臣某中謝伏念臣猥
緣小技久辱大恩當陛下應乾出震之初攝賛西臺之
名命暨陛下祀帝榮親之際預裁中禁之詔書自當優
游乎文字之間乃敢僭率於封章之內再茲妄發可謂
數竒蘓蘓威命之行岌岌孤蹤之殆晨趨鳳闕綰五組
之光華夕侶漁舟被一簑之襍褻雖云去國尚爾全生
此盖伏遇皇帝陛下御衆以寬退人以禮縱負江山之

罪不加斧質之誅姑使汰歸俾知循省臣虛霑廩稍寔
覲面顏身在江湖悵闕庭之浸遠心如葵藿望天日以
常傾臣無任

乾道九年

辭富沙乞宮祠第一狀

朝散郎新知建寧軍府事兼管內勸農使周某狀右某
近準告命授前件差遣尋準省劄脩奉聖旨疾速前去
之任緣某舊有心氣之疾去歲以來發作無時觸事憤

忘舉措顛錯近日復中風濕左臂緩弱腰脊沉痛衆所共見委寔不能支吾難以冒膺郡寄況起廢之由昨已報行在人人皆知聖朝公恕不棄一夫之意今來自以不勝狗馬之疾乞後開散揆之事理別無規避欲望朝廷特賜敷奏再與宮觀一次它時有瘳別聽委使謹具申

尚書省伏候指揮

四月十日三省同奉聖旨不允依已降指揮疾速前去之任仍具趣發月

日申尚書省

第二狀

右某昨緣疾病陳乞宮祠準省劄脩奉聖旨不允依已
降指揮疾速前去之任仍具起發月日申尚書省詔旨
丁寧理難稽慢自合恭稟即時起發而所患浸加勉強
不前須至再傾肝膽哀祈造化蓋聞難得者時當安者
命如某不肖親逢聖主首被拔擢中雖流落簡記不忘
頃再還朝寢躋華要每因燕見獎勸有加得時如此寧
非至幸然自初政以來逮今一紀其間閒廢不翅十載
常恨無階少殫犬馬之力茲叨鴻施起首潛藩宣化承

流庶幾自竭豈應再三避免以干大戾其如命與時左
事與願違心氣舊疾日甚一日腰臂痛楚通夕呻吟稟
生窮薄抑可知已若復不安義命與疾涉遠大或斃踏
道路小則遂為廢人仰揆寬仁必賜憐憫况某父名某
適同府號縱禮律二名無避在人子終有未安伏望朝
廷特賜敷奏令且食祠祿以便醫藥圖報天地父母之
恩九殞無已謹具申尚書省伏候指揮

六月十日省劄
檢坐不允指揮

及吏部供二名偏犯依
條不合迴避催促赴任

第三狀

右某昨緣衰疾疊乞外祠屢準省劄未奉俞音已挾僣起發赴新任依已降指揮具申尚書省訖今來至隆興府豐城縣心氣大作顛倒昏忘見於言動服藥無效日益羸困進則病勢如此止則逋慢有誅重念某才力凡下無分毫可取誤蒙記錄畀之民社豈不思仰體宥過之意自訖治民之效不幸命薄病侵靡容勉強乞為敷奏特與宮觀一次使得專意醫藥異時圖報尚冀捐軀

謹具申尚書省伏候指揮

九月十七日三省
同奉聖旨不允

謝宮觀表

臣某言伏奉勅命差臣提舉江州太平興國宮任便居住者病辭假守方虞金木之誅恩與貞祠曲荷乾坤之造危心頓釋感嘆載零臣某中謝伏念臣蚤直龍飛首登螭陛出入雖周於一紀廢閒乃閱於十年伊悔吝之自貽蓋竒窮之素定比叨鴻渥寵畀潛藩非不知委寄之隆所願効承宣之力而臣命同才薄事與心違積困

采薪之憂未臻勿藥之喜逡巡屢請荏苒三時黃香空
任於宮臺難堪東郡汲黯懼填於溝壑敢薄淮陽迄誠
恫之上通條俞音之下逮此蓋伏遇皇帝陛下天臨海
宇器使人材憐臣久負譴訶稍令起廢察臣寔嬰衰疾
復許投閒隆寬之施如斯力報之圖曷已臣謹當屏息
衡茅之下精心香火之間殿天子之邦進莫陪於君子
祝聖人之壽竊自附於封人臣無任

淳熙元年

謝右文殿修撰表

遜迹山林久隔闕庭之望寓名鉛槧驟參館殿之班拔
罪戾於墜淵交戰兢於維谷臣某中謝臣竊考聖代集
仙之職蓋稽唐朝麗政之規雖沿革之不同在寵光而
則一粵從紹聖復論譔以優去國之臣爰暨政和易名
稱以示崇儒之意寧許爝螢之質遙依奎壁之光伏念
臣初無他長而好自用辱上聖之知殊厚顧下愚之性
不移向非託命於乾坤久已投身於鈇鉞夫何顯職猥

及孤蹤戴盆方絕於望天豐蔀忽容於見日此蓋伏遇
皇帝陛下福威惟辟廢置馭臣爾自速辜夙示涵容之
度予其大賚更加藻飾之恩披肝不足以形感激之詞
碎首不足以報生成之德重念臣周旋三館首尾六年
逮茲新渥之鼎來恍若舊游之夢到望屬車之臨幸敢
期奔走於英躔頌當宁之好丈尚可矜誇於野老臣無
任

淳熙二年

辭免召命申省狀

某伏準省劄脩奉聖旨召赴行在恩許賜環禮難俟駕
况遵近制辭避無從但以心氣怔營動成昏忘筋骸疲
憊良阻步趨審已再三理難自默重念某早塵華近誤
簡眷知去朝雖曰三年被寵殆無虛歲剖符鉅鎮既以
病辭貼職書林乃茲冒受寬譴訶而已幸叨收召以何
為安伏望朝廷特與敷奏且令依舊宮觀差遣庶安愚
分免速罪辜今來不敢稽留上命已一面扶病起發外

謹具申尚書省伏候指揮

二月十六日三省同奉聖旨
不允依已降指揮疾速赴行

在

到闕上殿乞郡或奉祠劄子

臣聞子牟心存魏闕望之意在本朝人臣愛君古今一也臣以非才自陛下即位之初入侍殿陛褒揚遷擢度越流輩犬馬之心豈欲遠去左右其如迂愚窮薄自無補報之路重以心氣腰膂之疾日增月益分於聖世永為棄物忽蒙收召感極涕零勉策衰疲來趨行闕既瞻

天日之表申臣子之敬其於分願已為甚足伏望聖慈
矜其無用憐其數竒且令依舊奉祠養病田里或於江
湖間試以支郡使之宣布聖德牧養細民尚能少報天
地父母之施區區懇誠寔在如此干犯天威臣無任戰
汗之至取進止

除待制辭免奏狀

右臣準尚書省劄子三月二十二日三省同奉聖旨除
臣敷文閣待制侍講者寵榮載集戰懼交懷臣竊以候

對詒謨侍言崇政非簡求於髦士則優禮於耆儒豈伊
極陋之姿應此久虛之典伏念臣受才鄙樸殖學荒疎
頃浸厯於清華殊未知於補報茲趨嚴召入覲威顏恭
聽溫言曲憐舊物諭選擇之有在謂精神之未衰而臣
心志益凋文華弗競盖嘗頓首香案之側復願養疴蓐
門之中敢期酌用於故常特許追參於近侍自知非據
人謂斯何仰冀睿明俯昭愚悃姑仍舊職改奉內祠如
此則戀闕孤忠既容陳力而就列掄材盛典不至為人

而擇官所有前件恩命臣未敢祇受謹錄奏聞伏候勅

旨

二月二十四日三省同奉聖旨不允

謝待制侍講表

臣某言伏奉告命除臣敷文閣待制侍講者竇儲邃密有嚴通籍之班聖學高明尤遴談經之選併茲虛授良以震驚臣某中謝伏念臣積冒恩私久辜任使既不能撥繁治劇服勞郡國之間又不能宿道嚮方宣力朝廷之上惟粗親於翰墨或小效於涓埃乃自中年造嬰衰

疾詞源因酒言每出則謬悠心氣冥頑動不知其差誤
顧在有為之世獨成無用之材私竊自憐分甘永廢豈
謂伏蒙皇帝陛下如天之度徧覆無殊並日之明容光
必照方旁求於多士不遂棄於一夫特許遄歸復令親
近綴班聯於內閣奉清燕於邇英而臣竊窺太史之書
嘗考仁皇之世允釐近列登進名卿趙師民素號博聞
始兼是職呂公著力辭召試爰有此選豈期勉出之孤
蹤亦用前修之故事乃文廣運固難措游夏之詞非道

敢陳所願論唐虞之際誓殫拙訥力報生成臣無任

舉楊萬里自代狀

右臣伏睹承議郎新差權發遣常州軍州主管學事兼
管内勸農事楊萬里居家孝謹從事廉方富於藝文可
脩西清之訪遂於經術無慙重席之榮臣寔不如舉以
自代

丐外劄子

臣以駑才蒙陛下異恩躡升次對專侍經幄坐縻廩稍

略無補報今既住講愈為素餐神惡僥踰累旬苦脾胃之疾緣此心氣愈更虛乏若復不自引退必致別有災屯伏望聖慈許臣以本官出守小郡或奉外祠圖報生成尚期糜隕取進止

六月十三日三省同奉聖旨不允

辭免兼直學士奏狀

右臣準尚書省劄子三省同奉聖旨差臣兼直學士院者錫命頻仍省躬震惕伏念臣早緣薄技誤簡淵衷粵自初元首叨入侍日來月往莫殫千一之愚天施地生

乃辱再三之召尚復眷憐而不已每於任使以有加顧
仙嶺之提鰲自存大手矧明庭之儀鳳方集奇才寧容
圭竇之人重寓金鸞之直是敢知難而自列仰祈遷令
以旁招所願專心誦聖謨於經幄毋令越職妨賢路於
禁林所有恩命臣未敢祇受謹錄奏聞伏候勅旨

九月
日

三省同奉
聖旨不允

辭免兵部侍郎奏狀

右臣準尚書省劄子節文三省同奉聖旨除臣兵部侍

郎日下供職者褒遷過分震懼靡寧臣竊以本朝置侍
從官特異前代蓋欲其精白一心論思獻納增重王國
非專使治有司之事而已自元豐改官制雖稍循周唐
舊典分治六曹然班列浸高職業猶簡委用之意夫豈
徒然若時夏官尤號清選臣以凡庸之質荷特達之知
五年之間兩兼攝貳略無補報有玷周行至於寓直禁
林執經崇政最為華近今悉冒居陛下虛心以求議論
而臣暗無一言陛下勵精以集事功而臣懦不舉職尚

寬汰斥已是保全復用何名更叨真拜而况早來奏對之際脩聞天獎雖未披於心腹已灼見其肺肝伏望聖明矜其自量非敢飾避特反惟行之令誓堅圖報之心所有恩命臣未敢祇受謹錄奏聞伏候勅旨

九月六日
奉御筆批

降詔
不允

不允詔 王淮撰

勅某省所奏辭免除兵部侍郎恩命事具悉文昌六職寔聯兩禁之華夏官貳卿兼總五兵之政屬時右

武宜得周才肆圖厥庸式叙乃位卿問學優於游夏
詞章過於卿雲自隆興之初元以柱史而入侍屢罄
論思之益尤推潤色之工擢寘經帷再升詞禁爰從
容而造膝嘗密勿以沃心嘉爾靖共副予虛佇乃即
司戎之任就頒綸綍之榮奚必固辭亟祇乃服所辭
宜不允故茲詔示宜知悉

辭免兼侍講奏狀

右臣準尚書省劄子節文三省同奉聖旨差臣兼侍講

者絲綸參集淵谷是虞伏念臣頃自召還親蒙簡擢酌
本朝待先儒之禮以次對專講勸之官今既進貳夏卿
仍聯翰苑若尚續漢殿六經之業殆將兼唐人三侍之
榮所憂仰累於殊私不獨自慙於非據願廓燭幽之鑒
別求詔媿之賢恭冒聰聞伏需報可所有恩命臣未敢
祇受謹錄奏聞伏候勅旨

閏七月十日奉御
筆批降詔不允

不允詔

勅某省所奏辭免侍講恩命事具悉朕古訓所師惟

道德是企多聞雖並以直諒為先卿強學力行愛君
憂國日在西清之邃熟陳前席之謨今茲侍經是謂
申命亟宜祇受若擡入室之微言何用抗辭事循牆
之曲謹所辭宜不允故茲詔示想宜知悉

謝兵部侍郎兼直學士院表

臣某言伏奉告命除臣兵部侍郎依舊兼直學士院仍
賜對衣金帶者通班內閣已塵次對之華列屬中臺復
冒亞卿之寵申命鑾坡之直增光禁路之游稽首拜嘉

省躬知愧臣某中謝臣竊以司戎任重視草才難自非
文武之兼資曷副國家之遴簡歷考正元而後惟六贄
衛次公之並克載稽南渡以來有汪綦綦密禮之故事
如臣末學難企前修徒夙幸於遭逢獲徧儀於清要愚
蠢倥侗之性每辱照知荒唐翫敝之詞數蒙嘉獎首尾
總經於五載攝承兩贊於七兵未嘗萌久假之心矧敢
覬為真之命橫黃金之帶驟拜新榮上白玉之堂更仍
舊貫大恩所被小已奚堪此蓋伏遇皇帝陛下剛健時

行緝熙日就運堯帝之德而奄有四海方懋乃聖乃神
之功立周王之政而灼見俊心不輕常任常伯之選孰
云懦緩叨此詔除冗資翰墨之所長尤非疲駑之可稱
臣敢不竭其忠藎濟以靖共體元豐肇正於官名願效
論思之寔念開寶初增於禁直勉圖潤色之工萬分可
酬九殞何憚臣無任

舉劉清之自代狀

右臣伏覩宣教郎新知撫州宜黃縣主管學事勸農營

田公事劉清之乃本朝名臣劉敞劉攽之從曾孫篤學
好修臨事不苟向者劉珙在樞府欲與相見即加論荐
清之嫌於自銜竟不肯往乾道九年秋用舉主考第改
官嘗有旨同張駒召赴都堂審察清之獨赴部注知縣
而去廣退如此近侍所稀舉以代臣寔允公議

文忠集卷一百二十二